

JAVNO PREDUZEĆE VETERINARSKA STANICA doo GORAŽDE
Goražde, Ibrahima Popovića 60
Račun: 101140000018010, Privredna banka Sarajevo-filijala Goražde
TELEFON-FAX: 00387 38 221 102
e-mail: vet.stanicagorazde@bih.net.ba
PDV br. 245004970001, Br.sudskog Rješenja: UF:045-0-Reg-22-000 050 - Općinski sud Goražde
ID: 4245004970001

Broj: 21-03/23
Dana: 23.03.2023.

GRAD GORAŽDE

1. Gradonačelnik
2. Služba za stručne poslove Gradskog vijeća
3. Predsjedavajući Gradskog vijeća

PREDMET: Dostava traženih podataka;

Veza: akt Predsjedavajućeg Gradskog vijeća broj 01-02-1-708 od 24.02.2023.

Poštovani,

Postupajući po Vašem aktu broj 01-02-1-708 od 24.02.2023, ovim putem Vas obavještavam o sljedećem:

Problemi, sa kojima je JP "Veterinarska stanica" d.o.o.Goražde suočena, više puta su ponavljani kroz obraćanja ovog direktora Vijeću i Gradonačelniku, pa ću ih ovim putem samo ukratko ponoviti.

Naime, činjenica je da **samo 2 terenska veterinara** (od kojih je jedan istovremeno i direktor, pa je zadužen i administrativnim poslovima) pružaju usluge na cijelom kantonu, kao i okolnim općinama u Republici Srpskoj (u posljednje vrijeme se bilježi povećan priliv stranaka iz okolnih općina RS-a), što jasno ukazuje na preopterećenost veterinara. Od 2016.godine Preduzeće nema uposlenog veterinarskog tehničara, iako je to prijeko potrebno za optimiziranje uslova rada. Treća zaposlena veterinarica ne obavlja terenski rad, stoga je pitanje zaposlenja barem jednog veterinarskog tehničara bilo prioritarno još prije 6 godina, međutim, isto nikada nije riješeno s obzirom na manjak finansija.

Do sada su sredstva predviđena budžetom od strane osnivača bila više nego simbolična što možete vidjeti iz izvještaja za posljednje 3 godine u prilogu ovog dopisa.

Neshvatljivo je da Javno preduzeće od općeg interesa za cijeli kanton, po pitanju zdravlja ljudi i životinja, od osnivača bude finansijski pomognuto kao neko udruženje građana ili slično. Takav odnos je proizvod neshvatanja važnosti veterinarske struke u društvu kao i nepostojanje želje da se tome posveti veća pažnja.

Nadalje, općepoznata je činjenica da su prostorije Veterinarske stanice smještene u prilično trošnoj kući, sa vrlo starim inventarom, dotrajalom ili improvizovanom veterinarskom opremom, koja ne zadovoljava trenutne standarde naše struke, što nam dodatno otežava rad i onemogućava davanje potpune i kvalitetne usluge trenutnim i potencijalnim klijentima. Svjesni smo činjenice da je u posljednjih nekoliko godina evidentan pad stočnog fonda na našem terenu što je jedan od razloga manjeg priliva sredstava u preduzeće. Obrazlagati ovu pojavu mislim da bi bilo suvišno s obzirom da je smanjenje ruralne populacije očigledna činjenica.

Napomenuo bih i da Preduzeće nema nadzorni odbor (na posljednji javni oglas od 19.10.2022. nije bilo prijavljenih kandidata). Skupština preduzeća je ostala bez jednog člana nakon što je isti zatražio da bude razriješen zbog sukoba interesa. Od tada nije raspisivan javni oglas. Dakle, dok se ne formiraju upravljačka tijela Preduzeća, mnoge važne aktivnosti su djelimično ili u cijelosti blokirane.

Također, naglasio bih i da bi aktivniji pristup osnivača u komunikaciji sa Preduzećem ostvario pozitivan učinak na rad Preduzeća.

Pregled ukupnih prihoda i rashoda u prethodne tri godine

Ukupno prihodi	2020.	2021.	2022.
	175.470 KM	166.322 KM	196.164 KM
Ukupno rashodi	2020.	2021.	2022.
	188.251 KM	178.675 KM	184.425 KM
Grantovi iz Budžeta Grada	2020.	2021.	2022.
	5.000,00 KM	5.000,00 KM	10.000,00 KM

Sredstva koja naše preduzeće dobija na godišnjem nivou od strane BPK Goražde i Federalnog ministarstva poljoprivrede, vodoprivrede i šumarstva se odnose na plaćanje izvršenih usluga po programima podsticaja i ona su sadržana u gore navedenim ukupnim prihodima, kao i grantovi od Gradske uprave.

KAO RJEŠENJE:

Osnivač, kroz budžet, može predvidjeti veći grant prema Preduzeću. Pomoć u nabavci opreme preko Gradskog štaba CZ je u toku i nadam se da će se intenzivirati u budućnosti. Poboljšanje uslova rada je prvi i najbitniji korak. Sama zgrada i radni prostor su prve stvari koje klijenti primijete. Uređenjem postojećeg prostora i zamjenom dotrajalog inventara stvorila bi se sigurna baza za daljnju nadogradnju i širenje povjerenja prema našem J.P.

Potrebna nam je oprema sa kojom ćemo biti konkurentni na tržištu a samim tim i pouzdaniji u pružanju kvalitetnije usluge klijentima. Od dijagnostičke opreme, koja nam je neophodna za kvalitetno obavljanje veterinarskih poslova, spomenut ću najbitnije: aparat za hematološku i biohemijsku analizu krvi, ultrazvuk i rentgen (kao uređaj koji bi zaokružio naš dijagnostički kapacitet a samim tim i povećao promet i interesovanje klijenata za naše usluge).

Evidentan je povećan obim posla u maloj praksi (liječenje, preventivno cijepljenje, hirurške intervencije na psima, mačkama kao i drugim vrstama kućnih ljubimaca) što predstavlja veliki potencijal za razvoj Preduzeća. Grooming pasa i mačaka je jako interesantan na tržištu (šišanje i kozmetički tretman) i vrlo često imamo upite od strane klijenata iz našeg grada i okolnih gradova za tu vrstu usluge za koju moraju ići u Sarajevo. Za ovu djelatnost nam je neophodan dodatni uposlenik kao i adekvatna oprema.

Pisanje projekata prema domaćim i stranim fondovima je jedna od opcija za razvoj Preduzeća. Do sada, taj potencijal nije bio adekvatno iskorišten, te se nadam da ćemo, u saradnji sa osnivačem i našim intenzivnijim zalaganjem, na tom polju uspjeti doprinijeti boljem finansijskom stanju Preduzeća. Imajte u vidu da je nova uprava bez prethodnog menadžerskog iskustva i da se trudimo da Preduzeće zauzme novi kurs i krene naprijed sa pozitivnim poslovanjem.



DIREKTOR

Sejdo Šapčahin dr.vet.med.